

朱子大全

冊四

朱子大全

卷一百一十五

晦庵先生朱文公文集卷第三

詩

奉同張敬夫城南二十詠

納湖

詩筒連畫卷坐看復行吟想像南湖水秋來幾許深

東渚

小山幽桂叢歲暮靄佳色花落洞庭波秋風渺何極

詠歸橋

綠漲平湖水朱欄跨小橋舞雩千載事歷歷在今朝

船齋

考槃雖在陸滉漾水雲深正爾滄洲趣難忘魏闕心

麗澤堂

堂後林陰密堂前湖水深感君懷我意千里夢相尋

蘭澗

光風浮碧澗蘭杜日猗猗竟歲無人采含薰祇自知

書樓

君家一編書不自圯上得石室寄林端時來玩幽蹟

山齋

藏書樓上頭讀書樓下屋懷哉千載心俯仰數椽足

蒙軒

先生湖海姿蒙養今自閱銘坐仰先賢點畫存彖繫

石瀨

䟽此竹下渠漱彼澗中石暮館繞寒聲秋空動澄碧

卷雲亭

西山雲氣深徙倚一舒歎浩蕩忽褰開爲君展遐眺

柳堤

渚華初出水堤樹亦成行吟罷天津句薰風拂面涼

月榭

月色三秋白湖光四面平與君凌倒景上下極空明

濯清

涉江采芙蓉十反心無數不遇無極翁深衷竟誰識

西嶼

朝吟東渚風夕弄西嶼月人境諒非遙湖山自幽絕

淙琤谷

湖光湛不流嵌竇亦潛注倚杖忽琮琤竹深無覓處

聽雨舫

綵舟停畫槳容與得欹眠夢破蓬窗雨寒聲動一川

梅堤

仙人冰雪姿貞秀絕倫擬驛使詎知聞尋香問煙水

采菱舟

湖平秋水碧桂棹木蘭舟一曲菱歌晚驚飛欲下鷗

南阜

高丘復層觀何日去登臨一目長空盡寒江列暮岑

次韻傅丈武夷道中五絕句

地久天長歲不留坐來念念失藏舟回看萬法皆兒戲還
直先生一笑不

分符擁節幾經年聞道方成屋數椽只恐未容高枕臥却
須持橐聽鳴鞭

勲業今從鏡裏休篋中空有敝貂裘死灰那復飛揚意惠
許深慚不易酬

常記桐城十載前幾回風雨對床眠他年空憶今年事却
說黃亭共惘然

諸郎步武各駸駸季子尤憐產萬金衣鉢相傳自端的老
生無用與安心

題畫卷丁亥

小山

飛來小坡坨未雨已滂瀟荒此定何人蘇公有遺記

吳畫

妙絕吳生筆飛揚信有神羣仙不愁思步步出風塵

卯研

端溪有潛虬孕此金玉質混沌一竅開千年瀉寒液

鬼佛

冥濛罔象姿相好菩薩面鬼佛吾詎知水石翫奇變

范寬

山雄雲氣深樹老風霜勁下有考槃人超搖得真性

題祝生畫

裴侯愛畫老成癖歲晚倦遊家四壁隨身只有萬疊山秘
不示人私自惜俗人教看亦不識我獨摩娑三太息問君
何處得此奇和璧隋珠未爲敵答云衢州老祝翁曾次自
有陰陽工峙山融川取世界咳雲睡雨呼雷風昨來邂逅
衢城東定交斗酒歡無窮自言妙處容我識爲我掃此須
臾中爾時聞名今識面回首十年齊掣電裴侯已死我亦
衰祗君雖老身猶健眼明骨輕鬚不變筆下江山轉葱蒨
爲君多織機中練更約無事重相見

秀野以喜無多屋宇幸不礙雲山爲韻賦詩烹伏
讀佳作率爾攀和韻劇思慳無復律呂笑覽之餘
賜以斤斧幸甚

高人山水心結習自無始五畝江上園清陰遍桃李一堂

聊自娛三徑亦可喜試問避俗翁何如尊賢里

溫公獨樂園在尊賢里

門前車馬客無非朝大夫問公獨何事中歲遽此圖長安
二三公髮白形枯臞隱憂念名節亦有此樂無隱憂念名節張大參

疏中語

君侯嗜圖史插架何其多徙居三十乘流汗幾橐駝千載
誰晤語端居自絃歌至哉天下樂歲月如子何

西山一何高雲氣出寒麓中有無事人鳴泉遶茅屋宴坐
今幾何無以媚幽獨興至偶成篇呼兒爲余讀

我居深山中茅舍破不補上見風攪林下有雲承宇聞公
落新宮戶牖不可數懶惰心力衰念公亦良苦

夜吟招隱詩月落寒泉井自非千載人誰與共清景散髮
心朗寥凝神味淵永功名恐相期富貴非所幸

仙人空山居道意妙羣物度世君則然脩身吾豈不飛行
仰雲路趺坐探理窟獨夜扣星壇清齋具簪笏

青山背夕陽茲景公所愛虛堂日落時遷坐一解帶嵐分
疑有處鳥度知無礙須臾暮色來默默無與會

端居屏塵慮萬事付一尊客來語世故舉白當浮君超搖
謝衆甫樽杳從諸孫何以自怡悅窗中見秋雲

清溪何迢迢上有千仞山山中學仙侶白石爲門關丹經
苦吟哦至道窮躋攀豈知人間世風塵縈九寰

次劉秀野蔬食十三詩韻

乳餅

清朝薦疎盤乳鉢有真味不用精瓊糜無勞爛羊胃

新笋

脩脩江上林白日暗風雨下有萬玉蚪三冬臥寒土

紫萼

誰將紫芝苗種此槎上土便學商山翁風餐謝肥羜

子薑

本草云薑久食去臭氣通神明或云傷心氣不可多食者非是

薑云能損心此謗誰與雪請論去穢功神明看朝徹

茭荀

寒茭翳秋塘風葉自長短剗心一飽餘并得牀敷軟

南芥

黃龍記昔遊園客有佳遺不謂洛生吟輟餐時擁鼻

煒菜

小草有貞性託根寒澗幽懦夫曾一噉感憤不能休

木耳

蔬腸久自安異味非所諺樹耳黑垂聃登盤今亦乍

蘿蔔

紛敷剪翠叢津潤擢玉本寂寞病文園吟餘得深齷

芋魁

沃野無凶年正得蹲鴟力區種萬葉清深煨奉朝食

筍脯

南山春筍多萬里行枯腊不落盤餐中今知綠如簣

豆腐

世傳豆腐本淮南王術

種豆豆苗稀力竭心已腐早知淮王術安坐獲泉布

白蕈

聞說閬風苑瓊田產玉芝不收雲表露烹瀹詎相宜

伏讀秀野劉丈閒居十五詠謹次高韻率易拜呈
伏乞痛加繩削是所願望

秀野

爲憐蘅芷滿芳洲特地臨江賦遠遊十畝何妨自春色萬

緣從此付東流靜看朝市真兒戲須信田園是老謀出處
知公有餘裕未應辛苦謝靈丘

積芳圃

樂事從茲不易涯朱門還似野人家行看靚豔須攜酒坐
對清陰只煮茶曉起蒼涼承墜露晚來光景亂蒸霞平生
結習今餘幾試數毗那襖上花

家山堂

負米歸來手自舂豈知門外有晴峰羨公竟日塵氛遠拄
頰看山幽興濃心鏡懸知不同調詩壇那敢少爭鋒空餘
遠嶽尋師意箇裏何妨爲指蹤

拙政堂

驥足寧同曳尾龜青山終是費心期陶公歸去有餘樂潘
令閑居不足追自笑十連非所慕未應三徑苦無資明朝

謾擁朱輪去猿鶴咨嗟政爾爲

香界

幽興年來莫與同滋蘭聊欲汎光風真成佛國香雲界不
數淮山桂樹叢花氣無邊曠欲醉靈氛一點靜還通何須
楚客紉秋佩坐臥經行住此中

春谷

武夷高處是蓬萊采得靈根手自栽地僻芳菲鎮長在谷
寒蜂蝶未全來紅裳似欲留人醉錦障何妨爲客開飲罷
醒心何處所遠山重疊翠成堆

舫齋

扁舟容與小房櫳搖颺簾旌蜀錦紅兩岸蒹葭秋色裏一
川煙浪夕陽中不愁灩澦雙蓬鬢未怯江湖萬里風築室
水中聊爾爾何須極浦望朱宮

藥圃

種藥春畦有近功，不辭耘耔謾勞躬。
漸看杞菊充庖下，卽見芝英入籠中。
病去自知非往日，身輕何必御冷風。
出門會有兒童笑，不是當年植杖翁。

山人方丈

方丈脩然屋數椽，檻前流水自清漣。
蒲團竹几通宵坐，掃地焚香白晝眠。
地窄不容揮麈客，室空那有散花天。
箇中有句無人薦，不是諸方五味禪。

龜峯樓

楊柳東邊桂樹西，小樓晴眺極霏微。
山川政爾供凝目，塵土何妨略振衣。
俯瞰桑田悲物化，閑披藥笈洞玄機。
却疑欄外連穹石，似厭支牀去不歸。

月波臺

潺潺流水注回塘中作平臺受晚涼四面不通車馬跡一
尊聊飲芰荷香韓公無復吟花鳥楚客何勞賦藥房少待
須臾更清絕月華零露洗匡牀

挽蔬園

未覺閑來歲月頻荷鋤方喜土膏勻連畦已放瑤簪露覆
地行看玉本新小摘登盤先餉客晚炊當肉更宜人却憐
寂寞公儀子拔盡園蔬不歎貧

秋香徑

門外黃塵沒九達坊中叢桂長樛枝三秋冷蕊從開落終
歲清陰不改移幽徑祗愁空翠滴濃香一任晚風吹攀援
却恨王孫遠惆悵千林

時

曲池軒

去年種竹長新篁今歲穿渠過野塘自喜軒窗無俗韻亦

知草木有真香林間急雨生秋思水面微風度晚涼却厭
端居苦無事凭欄閑理釣絲長

前村

題下恐當
有梅字

玉立寒烟寂寞濱仙姿瀟灑淨無塵千林搖落今如許一
樹橫斜獨可人真與雪霜娛晚景任從桃柳殿殘春綠陰
青子明年事衆口驚嗟鼎味新

秀野劉丈寄示南昌諸詩和此兩篇

滕王閣下水初生聞道登臨復快晴帝子詎知陳迹在長
江肯趣曲池平山楹雨罷珠簾捲簷鐸風驚玉佩鳴滿眼
悲涼今古恨人生辛苦竟何成

知向潮邊弄碧漪欄干三撫漾晴輝流傳妙語驚離闕想
像清游欲奮飛公去不應停驛騎我來直欲掛朝衣南州
高士何由見且看新荷出水稀